

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 16
Agosto 21, 2010
www.philippinerevolution.net

Editorial

Pakikibaka sa Hacienda Luisita, laban ng masang magsasaka sa buong bansa

Ang Hacienda Luisita ay sumisimbolo sa malakolonyal at malapyudal na sistemang gumagapos sa bansa sa pagkaatrasado at walang katapusang krisis. Ang mahaba at nagpapatuloy na kasaysayan ng asyenda ay salaysay ng masidhing pagsasamantala at pang-aapi, maigting na makauring tunggalian at pakikibaka para sa matagal nang minimithing katarungang panlipunan.

Walang lubay ang maniobra at pakana ng angkanng Cojuangco upang mapanatili ang kanilang monopolyo sa asyenda at hadlangan ang pamamahagi nito sa mga magsasaka at manggagawang bukid. Lalo't hawak uli ng angkan ang Malacañang, malakas ang kanilang loob na gumawa ng gayong mga maniobra.

Nito lamang nagdaang linggo, nagpakana ang mga Cojuangco ng huwad na "compromise agreement" na isinalaksak sa lalamanan ng mga magsasaka at manggagawang bukid gamit ang pwersa, panlilinlang, panunhol at panghahati. Pinalalabas sa huwad na kasunduan na sumasang-ayon ang

mga magsasaka at manggagawang bukid sa pagpapatuloy ng Stock Distribution Option (SDO) sa halip na pamamahagi ng lupa. Malinaw na ang layunin nito ay pangunahan ang pagdinig ng Korte Suprema sa petisyon para pawalambisa ang *temporary restraining order* sa utos ng Presidential Agrarian Reform Council (PARC) noong 2005 na ipailalim na ang asyenda sa sapilitang pamamahagi.

Agad na pinalakpakan ni Presidente Benigno Cojuangco-Aquino III ang kasunduan bagamat nagmamaang-maangan siya sa kanyang kinalaman doon at sinasabi niyang ang usapin ng HLI ay simpleng panloob lamang na pagtatalo.

Ang panunumbalik ng mga Cojuangco sa poder ay muling nagpapatampok sa pakikibaka para sa tunay na reorma sa lupa sa asyenda at sa paggamit ng kapangyarihan para supilin ang paglaban ng mga magsasaka at manggagawang bukid.



Mga tampok sa isyung ito...

Hungkag ang kasunduan sa Luisita
PAHINA 3

10 armas, nasamsam ng BHB
PAHINA 7

Panukalang dagdag na 2 taon sa edukasyon
PAHINA 11

Ang pagtanggap ipamahagi ang Hacienda Luisita ang pinakamalaking usaping nakaambang bumakbak sa balatkayo ni Aquino bilang tagapaghatid ng makabuluhang pagbabago. Ipinakikita ng nag-iibayong makauring tunggalian sa asyenda na ang kanyang paghahari ay walang pinagkaiba sa lahat ng nagdaang rehimeng pawang nagsilbi lamang sa interes ng malalaking asendero, kumprador at mga dayuhan. Inilalagay nitong muli sa atensyon ng buong bayan ang kapihan at paghihirap ng mga magsasaka at manggagawang bukid sa Hacienda Luisita pati na sa marami pang asyenda sa buong bansa.

Mula nang itayo ang papet na republika, pawang huwad at panlinlang ang mga programa sa reporma sa lupa na ipinatupad ng mga nagharing rehimen. Sa halip na malutas ang pyudal at malapyudal na pagsasamantala at pang-aapi sa mga magsasaka, sumahol pa ito sa pagdaang mga dekada. Lalong lumaki ang konsentrasyon ng lupa sa kamay ng mga luma at bagong panginoong maylupa at sa mga dayuhang imperyalistang korporasyon. Lalong dumami ang mga magsasakang walang sariling lupa.

Sa harap ng nag-iibayong kahirapan at kagutuman ng mga magsasaka, patuloy nilang ipinaglalan ang tunay na reporma sa lupa sa lahat ng posibleng larangan. Anumang pagsisikap ang gawin ng reaksyunaryong rehimen para sila'y linlangin, patahimikin at supilin, walang tigil na tutuligsain at lalabanan ng mga magsasaka ang bogus na CARP, ang mapanlinlang na pagpapatuloy nito sa anyo ng CARPER, ang pakanang SDO at iba pang katulad na panlo-loko.

Batid ng magsasaka at manggagawang bukid na hindi basta bibitiwan ng pamilyang Cojuangco ang malawak na asyenda. Mula nang manahin ang asyenda sa mga kolonyalistang Espanyol at palawakin pa ito sa mga sumunod na dekada, nagpakasasa ang pamilyang Cojuangco sa pawis at dugo

ng mga magsasaka at manggagawang bukid. Lalong walang balak ang mga Cojuangco na bitiwang asyenda ngayong bilyun-bilyong piso na ang kinikita nila sa operasyong komersyal at mala-industrial doon. Samantala, patuloy na ipinagkakait ang katarungang panlipunan sa mga tagabungkal ng lupa at lumikha ng yaman ng mga Cojuangco.

Ang laban sa Hacienda Luisita ang sagisag ngayong ng pakikibaka para sa tunay na reporma sa lupa sa buong bansa.

Nagiging sentro din ito ngayong ng paglaban sa reaksyunaryong rehimeng Aquino. Sa pagkatig ni Aquino sa mga Cojuangco sa mahigpit na pagtutol nito sa reporma sa lupa, inilinaw na niya ang kanyang paninindigan laban sa masang magsasaka at mga manggagawang bukid.

Dapat mahigpit na panghawakan at ibandila sa lahat ng sulok ng bansa ang laban sa Hacienda Luisita. Pagsilbihin itong mitsa ng iba pang malalaking laban ng masang magsasaka at di mamatay-matay na gatong sa nag-uumalab na kahilingan ng masang magsasaka sa buong bansa para sa tunay na reporma sa lupa, anuman ang mga balakid dito.

Kaalinsabay nito, patuloy na ibubwelo ang rebolusyong agraryo sa buong bansa. Tiyak na magkakatamtam ito ng malalaking tagumpay sa mga darating na panahon kaagapay ng pagsusulong ng armadong pakikibaka at pagtatayo ng mga rebolusyonaryong base sa kanayunan. **AB**



Taon XLI Blg. 16 Agosto 21, 2010

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

| | |
|---|----|
| Editorial | |
| Pakikibaka sa Hacienda Luisita | 1 |
| Hungkag ang kasunduan sa Hacienda Luisita | 3 |
| Kaliwa't kanang pandaraya ng SDO | 4 |
| Pakikibaka sa Luisita, umaani ng suporta | 4 |
| Usapang pangkapayapaan, hindi umuusad | 5 |
| Mga balakid sa usapan, binatikos ng MILF | 6 |
| Matatagumpay na TO | |
| 10 armas, nasamsam ng BHB | 7 |
| "Kakasa ka ba?" | 8 |
| Pananalanta ng pasistang estado | |
| Di makataong paglilipat sa mag-ina | 9 |
| Patakaran ng tortyur, muling tumatampok | 9 |
| Dagdag na 2 taon edukasyon, tinututulan | 11 |
| Balita | 12 |

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

Hungkag ang kasunduan sa Hacienda Luisita

Huwad at hungkag ang kasunduang pinakulo ng Hacienda Luisita Incorporated (HLI) para sagkaan ang pamamahagi ng lupa sa mga magsasaka at mapanatili ang pag-aari at kontrol dito ng mga Cojuangco. Ginamit ang panunuhol, panlilinlang, pananakot at pagmamaniobra upang palabasing “tinanggap” ng mga magsasaka ang “kasunduan”.

Sa “kasunduang” ito, pinapili ang mga magsasaka kung patuloy ba nilang hahawakan ang kanilang mga sapi sa ilalim ng iskemang Stock Distribution Option (SDO) o tatanggap sila ng lubhang pinaliit na piraso ng lupa. Ang lupang iniilaan ng HLI para ipamahagi umano ay 1,366 ektarya na lamang mula sa dating 4,915 ektaryang agrikultural na lupain ng asyenda na sinaklaw ng naunang kasunduan sa SDO.

Pinalalabas ng mga Cojuangco na suportado ng mahigit 7,300 (sa kabuuang 10,500 nakalista) magsasaka sa asyenda ang “kasunduan.” Lagpas na lamang daw sa 1% (139 indibidwal lamang) ang pumili na makakuha ng lupa. Mangangahulugan na wala pang 200 ektarya ang kabuuan ng ipamamahaging lupa, kung sakali.

Kinwestyon ni Lito Bais, tagapangulo ng United Luisita Workers Union (ULWU), at iba pang lider ng mga magsasaka at manggagawang bukid sa asyenda ang proseso ng pagboto. Ayon kay Bais, kinasangkapan ang mga upisyal ng barangay at mga tray-

dor at bayaran para hakutin ang mga magsasaka mula sa kanilang mga tirahan. Pinangakuan ang mga magsasaka ng P20 milyon paunang bayad. Daragdagan pa raw ng P130 milyon ang naipamahagi na kung aaprubahan ng Korte Suprema ang “kasunduan.” Pero barya lamang ang natanggap ng karamihan ng mga magsasaka na ngayo’y nagsisi sa kanilang pagsang-ayon sa SDO.


Minadali ang pagpapatupad ng naturang “kasunduan” para pangunahan ang nakatakang mga pagdinig ng Korte Suprema tungkol sa petisyon ng HLI na pawalambisa ang direktiba ng Presidential Agrarian Reform Council (PARC) at Department of Agrarian Reform (DAR) noon pang 2005. Kinakansela ng direktibang ito ang SDO at iniutos ang pamamahagi ng 4,915 ektaryang lupa ng asyenda. Sa unang pagdinig ng Korte nitong Agosto 18, nagkautal-utal ang mga abuga-

do ng HLI na sagutin ang maraming kwestyon tungkol sa mga anomalya sa pagpapatupad ng SDO na ipinukol sa kanila ng mga mahistrado.

Samantala, malaking bahagi na ng lupang dapat na maipamahagi sa mga magsasaka ay naisailalim na sa kumbersyon, naibenta o natayuan na ng mga proyektong komersyal at mala-industriyal. Noon pang dekada 1990 ay pinaaprubahan ang kumbersyon ng umaabot sa 3,800 ektaryang lupang agrikultural tungo sa “komersyal, industriyal at residensyal na gamit.” Umaabot na sa 2,000 ektarya ang ipinailalim sa kumbersyon, ibinenta o pinauupahan para sa mga proyektong di agrikultural. Bilyun-bilyon na ang kinikita ng mga Cojuangco sa mga ito. Pinakamalaki rito ang pagpapagamit ng 83 ektarya sa halagang P1 milyon bawat ektarya, para daanan ng Subic-Clark-Tarlac Expressway (SCTEx) na itinulak mismo ni Benigno Aquino III nang siya ay senador pa.

Inianunsyo na rin ni Fernando Cojuangco, *chief operating officer* ng Tadeco, Central Azucarera de Tarlac, HLI at ng Jose Cojuangco & Sons, Inc., ang planong kumbersyon ng natitira pang mga lupaing agrikultural ng asyenda. Maging ang kalakhan ng plantasyon ng tubo sa asyenda ay balak na raw nilang ibaling sa produksyon ng *bio-ethanol*. Ang iba pa ay ibabaling naman daw sa mga pananim na pang-eksport.

Malinaw dito na walang anumang balak ang angkan na bitiwang ang lupain ng asyenda at ipamahagi ito sa mga magsasaka. Sa mga balakin ng angkan Cojuangco, nakaambang palayasin ang libu-libong nagbubungkal at tuluyang pagkaitan ng katarungang panlipunan.



Kaliwa't kanang pandaraya ng SDO

Kaliwa't kanan ang ginawang pandaraya ng mga Cojuangco sa pagpapatupad ng Stock Distribution Option (SDO) upang panatilihin ang kanilang monopolyong pag-aari sa lupa ng Hacienda Luisita.

Ang mga Cojuangco mismo ang nagsingit ng iskema ng SDO sa Executive Order 229 ni Pres. Corazon Cojuangco-Aquino bago pa man maisabatas ang CARP. Layon ng pagsingit nito na mailigtas ang asyenda ng mga Cojuangco at iba pang katulad na malalaking asyenda sa aktwal na pamamahagi ng lupa.

Sadyang itinayo ng mga Co-

juangco noong 1989 ang Hacienda Luisita Inc. para magsilbing prenteng korporasyon sa pagpapakana ng iskemang SDO at mamantine sa pag-aari nilang Tarlac Development Corporation (Tadeco) ang kontrol sa kalakhan ng kayamanan sa lugar. Ang lupang dapat sanang mapunta sa mga magsasaka ang siyang itinuring na bahagi ng mga magsasaka at kinatawan ng 33% ng

kabuuan ng mga sapi sa HLI.

Ayon sa batas ay limang ektarya lamang ang dapat matira sa panginoong maylupa. Subalit umabot sa 1,500 ektarya ang nanatili sa mga Cojuangco. Kalakhan dito ay mga lupang kinatatayuan ng mga bahay ng mga magsasaka at manggagawang bukid sa asyenda, at mga "pagpapaunlad sa lupa" tulad ng mga kalsada. Nasa 4,915 ektarya lamang ng kabuuang 6,500 ektarya ang sinabing ipamamahagi sa 6,300 magsasakang nagtatrab-

Pakikibaka sa Luisita, umaani ng suporta

Umaani ng malawak na suporta ang mga magbubukid sa Hacienda Luisita sa pakikibaka nila para sa pamamahagi ng mahigit 4,000 ektaryang lupain ng pamilyang Cojuangco-Aquino. Ipinakita ito nang dumalo ang umabot sa 2,000 sa raling multi-sektoral nitong Agosto 18 sa harapan ng Korte Suprema sa Taft Avenue sa Maynila kung saan idinaos ang pagdinig sa kasong agraryo.

Bukod sa mga kasapi ng United Luisita Workers Union (ULWU), Alyansa ng mga Manggagawang Bukid sa Luisita (AMBALA), Unyon ng mga Manggagawa sa Agrikultura (UMA) at Kilusang Magbubukid ng Pilipinas, naroon din ang Alyansa ng mga Magbubukid sa Gitnang Luzon (AMGL) at ang pederasyon ng mga kababaihang magsasaka na AMIHAN. Sumamang rin sa martsa ang delegasyon ng Katipunan ng mga Samahang Magbubukid sa Timog Katagalugan (KASAMA-TK) na kinaaaniban ng mga magbubukid mula sa Hacienda Yulo sa Canlubang, Calamba, Laguna; Hacienda Roxas sa Nasugbu, Hacienda Zobel sa Calatagan at Hacienda Agoncillo sa Laurel, lahat sa Batangas. Kaisa sila sa panawagan ng mga kauri nilang anakpawis sa Hacienda Luisita na hindi na sila makapaghihintay ng dagdag na 53 taon para makamit ang lupa ng Luisita.

Sumamang rin sa martsa-rali ang mga mag-aaral ng University of the Philippines sa Diliman, na mga kasapi ng UP Kilos Na. Mula sa mataas na palapag ng isang gusali ng University of the Philippines-Manila Campus na katapat ng Korte Suprema, nagladlad ang mga estudyante ng poster na may taas na

sampung talampakan at bumabatikos sa pagtanggig ng mga Cojuangco na ipatupad ang reporma sa lupa sa Hacienda Luisita. Kasama nilang nakisimpatya sa mga magsasaka ang mga taong simbahan, tagapagtaguyod ng karapatang-tao, mga artista ng bayan, mga manggagawa, migrante at iba pang sektor ng lipunan. Ani Rep. Rafael Mariano ng partidong Anakpawis at tagapangulo ng KMP, dito nakatuon ang lahat ng mata ng lipunan dahil sa makasaysayang araw ng Agosto 18, nagharap sa kauna-unahang pagkakataon sa Korte Suprema ang mga inapi at ang umaapi sa kanila.

Inabot nang limang oras ang mga argumento ng mga abugado ng HLI kaya itinakda muli sa Agosto 24 ang pagdinig at ang mga abugado ng mga inagrabyadong magbubukid ang siyang magpepresenta ng kanilang mga argumento.

Noong bisperas ng pagdinig sa kaso, isang misa ng pagkakaisa ang idinaos sa Sto. Domingo Church sa Quezon City. Pinangunahan ito ni Bishop Teodoro Bacani at dito binasa ang upisyal na pahayag ng Catholic Bishops Conference of the Philippines-National Secretariat on Social Action (CBCP-NASSA) at National Clergy Discernment Group na bumabatikos sa inhustisya at warlordismo sa Hacienda Luisita mula pa noong 1957 hanggang 2010.

Sa labas ng Maynila, naglunsad ng mga kilos-protesta ang mga progresibong organisasyong kalyado ng mga magsasaka at mangingisda sa mga syudad ng Legazpi, Cebu, Bacolod, Tacloban, Davao, Butuan at iba pang pangunahing lunsod. **AB**

ho noon sa asyenda.

Pinaliit ang halaga ng lupang dapat mapunta sa mga magsasaka (P40,000 lamang bawat ektarya) para lumiit ang magiging katumbas nito sa kabuuang sapi ng HLI. Samantala, pinalaki naman nang sampung ulit (mahigit kalahating milyong piso bawat ektarya) ang halaga ng lupang hawak ng mga Cojuangco. Itinuring ding bahagi ng mga Cojuangco ang mga makinarya, pondo at iba pang pag-aari. Masahol pa, inangkin din nila ang mga produkto ng mga magsasaka (tubong di pa naaani, nakaimbentaryong asukal at maging ang benta ng asukal).

Sa pamamagitan ng mga salamangkang ito, inangkin ng mga Cojuangco ang 67% ng mga sapi ng HLI, samantalang 33% ang pinaghatian ng mga magsasaka.

Panibagong salamangka na naman ang ginawa sa bagong "kasunduan." Dito'y higit pang pinaliit ang sukat ng lupang nakalaan umano sa pamamahagi. Mula sa 4,915 ektarya, ang 33% na sapi ng mga magsasaka sa HLI ay katumbas na lamang umano ngayon ng 1,366 ektarya.

Ayon sa batas ng CARP, ang pagsasalin ng mga sapi ay dapat makumpleto sa loob ng dalawang taon matapos pagtibayin ang batas o makaraang aprubahan ng PARC ang plano para sa gayong pamamahagi. Kung hindi ito matutupad ng kinauukulang korporasyon, ang lupa ay ipaiilalim na sa sapilitang pamamahagi. Sa HLI, noong 2004 lamang sinimulang mama-

hagi ng mga sapi samantalang noon pang 1989 inaprubahan ang SDO sa asyenda.

Ginawa ring hanggang 30 taon ang pamamahagi ng mga sapi sa anyo ng sweldo na may katumbas na oras ng pagtatrabaho sa asyenda. Taun-taon, 1% lamang ng halaga ng mga sapi ang naibibigay sa mga magsasaka at manggagawang bukid. Magdedepende pa rin ang kanilang makukuha sa kabuuang oras ng pagtatrabaho ng mga indibidwal na magsasaka. Lubusan pang mawawala ang sapi kapag tumigil sa trabaho.

Para tuluy-tuloy na paliitin ang halaga ng saping hawak ng mga magsasaka, sadyang binabawasan ang oras ng pagtatrabaho ng mga magsasaka. Gumagawa rin ng mga paraan para mapilitang umalis na ang mga orihinal na tenante. Umuupa rin ng karagdagang 4,000 kaswal na manggagawang bukid at binibigyan ng minimum na tig-iisang sapi upang sapawan at palabnawin ang halaga ng saping hawak ng mga orihinal na magsasaka.

Sa gayon, lalong lumaki ang bahaging sapi ng pamilyang Cojuangco kumpara sa hawak na sapi ng bawat magsasaka. Bukod sa iba pang mararahas at maruruming paraan, ang mabilis na pagpapalobo sa bilang ng mga magsasaka at pagtatayo ng mga pekeng organisasyon ay ginagamit din sa pagsisikap na palabnawin at mapahina ang kakayahan ng orihinal na mga magsasaka at manggagawang bukid na lumaban at maggiit ng tunay na reporma sa lupa at iba pang karapatan nila sa loob ng asyenda. **AB**

Usapang pangkapayapaan, hindi pa rin umuusad

Nababahala na ang National Democratic Front of the Philippines (NDFP) sa takbo ng negosasyong pangkapayapaan nito sa Guberno ng Republika ng Pilipinas (GRP). Ito ay dahil mula nang matapos ang SONA ni Benigno Aquino III, wala pa itong ipinakitang positibong palatandaang mabubuksan muli ang usapang pangkapayapaan.

Ito ang ipinahayag ni Ka Luis Jalandoni, tagapangulo ng NDFP Peace Panel, sa kanyang sulat sa Friends of Ecumenical Bishops Forum noong Agosto 11.

Binatikos niya ang pagpupumilit nina Aquino at ng kanyang kalihim sa depensa na magkaroon mu-na ng malawakan at matagalang tigil-putukan bago ang usapang pangkapayapaan. Ang pag-uulit sa paunang kondisyong ito kasabay ng planong pagdaraos umano ng

mga negosasyon sa lokal na antas ay paglabag sa The Hague Joint Declaration of 1992, sabi ni Jalandoni.

Ganito rin noon ang paninindigan ni Cory Aquino, ang ina ng kasalukuyang pangulo, paalala ni Jalandoni. Tinutulan ng naunang Aquino ang mga negosasyon sa mga repormang panlipunan, pang-ekonomya at pampolitika. Matapos ang pagbagsak ng 60-araw na tigil-putukan at usapang pangkapayapa-

an bunsod ng pagmasaker sa mga magsasaka sa Mendiola noong Enero 1987, iwinasiwas ni Aquino ang "espada ng gera".

Tila hihigitan pa ni Benigno Aquino III ang pinalitan nitong si Gloria Arroyo sa pagpapatupad ng kontra-rebolusyonaryong gera ayon sa dikta ng US, sabi naman ni Jorge "Ka Oris" Madlos, tagapagsalita ng NDF-Mindanao. Sa ngayon, dinudumog ng apat na dibisyon ng AFP ang mga pinaghihinalaang sona at baseng gerilya ng mga rebolusyonaryong pwersa sa isla.

Umaabot sa 30 sa mahigit 40 batalyon ng AFP sa Mindanao, kabilang ang mga pwersang paramilitar, ang naglulunsad ng malawakang operasyong militar laban sa mga pwersa ng Bagong Hukbong Bayan (BHB). Gamit nila ang mga kanyong 105 mm at mga eropla-

nong paniktik at pambomba. Pawang ang mga komunidad ng mga Lumad at mga setler na magsasaka ang tinatamaan ng mga pambobombang ito.

Hindi dapat magpaloko ang mamamayang Pilipino kay Aquino, paalala ni Ka Oris. Nagkukunwa itong mahinahon pero nasa likod nito ang kanyang pasistang katangian.

Sinabi naman ni Fr. Santiago Salas, tagapagsalita ng NDF sa Eastern Visayas, na hindi magtatagumpay ang binabalak na lokal na negosasyong pangkapayapaan ng 8th ID ng Philippine Army. Mahigpit itong tututulan ng lahat ng mga rebolusyonaryong pwersa dahil mulat ang mga ito na ang pagtalakay sa mga ba-

tayang suliranin ng mamamayan ay dapat gawin sa komprehensibong paraan at sa pambansang antas.

Ipinahayag naman ni Kasamang Concha Araneta, tagapagsalita ng NDF-Panay na maaaring magkaroon ng tigil-putukan pagkatapos mabuo ang mga pangu-nahing kasunduan sa mga repormang panlipunan, pang-ekonomya at pampulitika.

Bagamat dismayado ang NDFP sa mga negatibong ipinakita ni Aquino, hinihintay pa rin nito ang mga emisaryo ng gubyernong Aquino, diin ni Jalandoni sa kanyang sulat sa mga obispo. Sa anu't anuman, nakahanda naman ang mga rebolusyonaryong pwersa na harapin ang mga pananalakay ng AFP. **AB**

Mga balakid sa usapan, binatang ng MILF

Mariing binatang ng Moro Islamic Liberation Front (MILF) ang malaking balakid sa usapang pangkapayapaan sa pagitan nila at ng Gubyerno ng Republika ng Pilipinas (GRP). Nagpahayag ng pagkadismaya si Al Haj Murad Ebrahim sa naunang deklarasyon ni Pres. Benigno Aquino III na magsisimula muli sa simula ang usapang pangkapayapaan.

Iginiit ni Ebrahim na dapat magsimula ito sa inabot na nito—kabilang ang Memorandum of Agreement on Ancestral Domain (MoA-AD) na napirmahan noong 2008 at kabuuan ng 87 kasunduang nabuo sa mga nagdaang taon ng usapang pangkapayapaan. Hindi na aatras ang MILF dito.

Itinatakda ng MoA-AD ang pagtatayo ng Bangsamoro Juridical Entity (BJE) na magsisilbing nagsasariling gubyerno ng mamamayang Moro at sasaklaw sa pagdurugtunging lupaing ancestral ng Bangsamoro. Di hamak na mas maunlad ang BJE sa kasalukuyang Autonomous Region of Muslim Mindanao sa usapin ng hahawakan nitong awtoridad sa pulitika, militar, ekonomya, edukasyon at kultura. Ngunit mariin itong tinutulan ng Kongreso at ibinasura ng Korte Suprema noong 2008. Kaugnay nito, huling napagkasunduan ng MILF at ng *peace panel* noon ng GRP na “rerebisahin ang napagkaisahang mga

punto sa layuning isulong ang isang komprehensibong kasunduang magresulta sa pampulitikang solusyong bunga ng negosasyon.”

Kaya naman nalugod si Mohagher Iqbal, pinuno ng negotiating panel ng MILF, nang magpahayag kamakailan si Atty. Marvic Leonen, pinuno ng *negotiating panel* ng GRP na humaharap sa MILF, na bukas ang gubyerno sa pagbabago ng konstitusyon upang bigyang-daan ang kasunduang mabubuo sa MILF. Ngunit kabibitiw pa lamang ni Leonen ng gayong pahayag ay kaagad na itong kinontra ni Aquino. Ani Aquino, wala sa prayoridad ng kanyang gubyerno ang *charter change* at hindi ito ang tamang panahon na pag-usapan ito.

Binatikos din ng MILF bilang pinakamalaking “eksternal na balakid” at pagmumulan lamang ng kumplikasyon sa usapang pangkapayapaan ang presensya ng mga pwersang militar ng US sa Mindanao. Ipinaabot ni Murad kay Aquino

no mismo na dapat gumawa na ng paraan ang rehimen para maalís na ang mga pwersang militar ng US bago magsimula ang usapang pangkapayapaan sa pagitan ng MILF at GRP. Para sa MILF, magiging malaking sagka sa usapang pangkapayapaan ang sagot ni Aquino na hindi maaaring mawala ang presensya ng US sa Mindanao.

Nagpahayag din si Aquino na gagawing lokalísado ang usapan, taliwas sa naging kalakaran noong nakaraan. Dagdag pa rito, nagpahayag si Aquino ng kagustuhang palitan ang Malaysia bilang tagapamagitan. Kung magkagayon, babala ni Murad, tiyak na maaantala at mamemeligro ang usapan.

Hindi rin nakatulong, ani Murad, ang mapanghamon na pahayag ni Gen. Ricardo David Jr., hepe ng AFP, na dudurugin daw ng gubyerno ang Bagong Hukbong Bayan at ang MILF pagsapit ng 2013. Nagpahayag si Murad na hindi sila nata-takot sa banta ng gubyerno, laluna’t patuloy silang nagsasanay ng kanilang hukbo, nadagdagan sila ng mahigit 60,000 bagong sandata at patuloy pa silang nagpaparami ng sandata dahil may teknolohikal na kakayahan at pagawaan sila ng matataas na kalidad ng mga armas. Idinagdag ni Murad na handa silang tuluy-tuloy na makipaglaban para sa karapatan sa sariling pagpapasya, kahit hanggang sa susunod pang henerasyon. **AB**



10 armas, nasamsam ng BHB

Sampung armas ang nasamsam ng mga Pulang mandirigma ng Bagong Hukbong Bayan (BHB) sa iba't ibang armadong aksyon mula Hunyo hanggang Hulyo. Walong elemento ng kaaway din ang napatay at walo rin ang nasugatan sa mga aksyong militar na ito.

Hulyo 30. Dalawang tauhan ng Philippine National Police (PNP) sa Capiz ang nasugatan at apat na armas ang nasamsam ng Bagong Hukbong Bayan (BHB) sa dalawang magkahiwalay na taktikal na opensiba.

Tinambangan ang mga pulis habang patungo sila sa Barangay Banate, Pontevedra, Capiz. Magre-sonde sana sila sa ulat na dinisarmahan ng BHB ang barangay kapitan ng nasabing lugar ngunit sa Sityo San Jose, Barangay Hipona pa lamang ay inambus na ang kanilang sasakyan. Tatlong pistola at isang *shotgun* ang nasamsam ng mga Pulang mandirigma sa bahay ng kapitan ng Barangay Banate.

Bago ito, binulabog ng BHB noong Hulyo 26 ang detatsment ng 82nd IB sa Barangay Osorio I, San Remigio, Antique. Nagtagal nang ilang minuto ang palitan ng putok ng BHB at mga tropang militar, CAFGU at CVO.

Hulyo 8. Matagumpay ang mga operasyong disarma na inilunsad ng isang yunit ng Eking Balacuit Command ng Bagong Hukbong Bayan sa Misamis Occidental sa Northeastern Mindanao Region (NEMR).

Alas-8:00 ng umaga, nakumpiska ng mga Pulang mandirigma ang dalawang pistola (isang 9 mm at isang kalibre .38) sa dalawang pulis na badigard ng alkalde ng Gingoog City nang pumunta ang mga ito sa lupa ng kanilang amo sa Barangay San Luis, bayan ng Medina. Nasamsam din nila ang dalawang radyong VHF sa mga badigard.

Bandang alas-9:30 ng umaga,

ginamit ng mga Pulang mandirigma ang sasakyan ng mga dinisarmahan pulis at sinalakay nila ang bahay ng isang dating barangay kapitan ng Barangay San Vicente sa nasabi ring bayan. Isang pistolang 9 mm ang kanilang nakumpiska.

Tumuloy pa rin sila sa Barangay Bangbang bandang alas-10:25 ng umaga, kung saan isa pang abusadong elemento ang dinisarmahan ng kanyang *shotgun*. Ang de-sabog na ito ang ginagamit niya sa pananakot sa mga sibilyan sa erya.

Isang araw bago ito, dinisarmahan din ng mga Pulang mandirigma ng Jabbar Salipudan Command-BHB ang isang elemento ng Citizens Armed Forces Geographical Unit (CAFGU) sa Barangay Malinwag, Esperanza, Surigao del Sur. Nakumpiska sa kanya ang isang Garand at isang pistolang 9 mm.

Hunyo 28-29. Hindi bababa sa walong sundalo ang napatay sa da-

lawang magkasunod na sagupaan sa pagitan ng 75th IB at mga Pulang mandirigma ng Boyboy Roa Command sa Sityo Lining, Sto. Domingo, Lumintao, Quezon, Bukidnon. Sa unang sagupaan, lima agad ang napatay sa tropa ng mga kaaway. Kinabukasan, pinasabugan ng BHB ng bomba ang nasabing tropa ng militar at nadagdagan ng tatlo ang napatay sa kanilang panig. Walang kaswalti sa BHB. Para makabawi sa kanilang kaswalti, pitong bala ng mortar ang kanilang pinasabog nang walang pagsasalang-alang sa kaligtasan ng mga sibilyan.

Hunyo 4 at 8. Anim na sundalo ang nasugatan sa mga operasyong harasment ng mga yunit ng BHB laban sa mga tropang militar sa Surigao del Sur.

Sa unang harasment, nasugatan ang limang sundalo ng 30th IB ng Philippine Army at Scout Rangers sa Barangay Umao, Camamoman, Gigaquit, Surigao del Sur noong Hunyo 4.

Apat na araw makaraan ito, isang sundalo ang napatay nang paputukan sila ng BHB sa naturang barangay.

AB



Kakasa ka ba?

"**T**atlumpu't apat na taong pinaglingkuran namin ang Triumph. Buong lakas namin, buong buhay namin, inialay namin," paglalahad ni Lita de la Cruz, pangulo ng unyong Bagong Pagkakaisa ng mga Manggagawa sa Triumph International. Binigkas niya ito sa kanilang piketlayn na itinayo sa harap ng nasabing empresa sa Taguig City para labanan ang bantang pagtatanggal sa kababaihang manggagawa. Pigil ang luhang idinugtong niyang, "Nagkamal sila ng bilyun-bilyong tubo"

Isa lamang ito sa mga eksenang tampok sa *Kakasa ka ba?* (*Hamon sa panahon ng krisis*), isang mahigpit 23-minutong bidyo-dokumentaryong nilikha at ipinalabas kamakailan lamang ng Mayday Productions sa pakikipagtulungan sa Kilusang Mayo Uno (KMU). Kabilang ito sa maiikling pelikulang napili para sa Ikalawang Pandayang Lino Brocra at ipinalabas sa University of the Philippines Film Institute nitong Agosto 11. Ipinalabas din ito sa iba pang komunidad.

Napapanahon at katangi-tangi ang bidyong ito dahil sa paglalarawan nito ng kalagayan ng mga manggagawa sa Pilipinas, laluna ang malawakang kawalan ng trabaho at mababang sahod.

Unang-una, ipinakita ng bidyo

ang iba't ibang manggagawang napilitang pumasok sa kung anuanong mapagkakakitaan, maitawid lamang sa gutom ang mga mahal sa buhay. Ipinakita ang isang dating manggagawa sa konstruksyon na hindi pa rin nakakakita ng trabahong matapos ang kontrata at ang asawa ng dating manggagawa sa pagawaan ng lata na wala na ring trabahong pagkatapos ng kontrata. Itinampok ang mga bumalik sa *pagre-repack* ng pansit at mga sitsirya, ang mag-uuling na nag-aalaga rin ng mga hayop para madagdagan ang kita at ang mga mangangalahig ng basura. Sa P200-220 na kinikita nila bawat araw, nanlulumong sinabi ng isang mangangalahig na "pampalipas lang ng gutom" ang ganitong kati-

ting na kita.

Sila'y nakatira sa mga komunidad kung saan umaasa pa noon ang mga tao sa maliliit na empresa na ngayo'y nangawala na dahil "itinumba" ng mga dambuhalang dayuhang korporasyong tulad ng Nestlé, Nissan at Toyota.

Inilarawan din ng bidyo ang pakikibaka ng 106 na manggagawa na basta-bastang tinanggal sa trabaho ng Daiho Philippines, at ng mga kababaihang manggagawa ng Triumph International. Pagkalugi ang kadalasang idinadahilan ng mga kumpanya sa mga kasong tanggalan. Ipinakita ng bidyo ang mga kalunus-lunos na datos ng kawalan ng trabaho sa Pilipinas na tinatayang aabot sa 11 sa bawat 100 manggagawa.

Kinapanayam sa bidyo ang mga lider-manggagawa at mga mananaliksik. Sa mga ito'y natukoy na matagal na ang krisis sa trabahong sa Pilipinas bunsod ng atrasadong ekonomya at bansot na agrikultura't industriya. Iginiit din ang pangangailangang ipaglaban ang regularisasyon ng malawakang bilang ng mga kontraktwal sa pamamagitan ng pagtatayo ng unyon na siyang maggigiit sa kabutihan ng mga aping manggagawa.

Ani Ka Elmer Labog, tagapangulo ng KMU, "Walang ibang solusyon sa kasalukuyang krisis ng sobra-sobrang produksyon at krisis mismo ng kapitalismo kundi ang pagtataguyod sa sistemang sosyalismo."

Nagpakita rin ang bidyo sa bandang huli ng mga eksena ng pagtatayo ng mga manggagawa ng mga piketlayn at paglulunsad ng mga militanteng grupo ng mga kilos-protesta na nananawagan ng pagtigil sa tanggalan sa trabaho, pagtaas ng sahod at pagtataguyod sa pambansang industriyalisasyon. Umalingawngaw sa mga pagkilos nito ang islogan "Hukbong mapagpalaya! Uring manggagawa!" **AB**





Di makataong paglilipat sa mag-inang Oliveros, binatikos

Mariing binatikos ng Bagong Alyansang Makabayan (BAYAN) ang di makataong pagtrato kina Carina "Judilyn" Oliveros at kanyang tatlong-linggong sanggol nang dalhin sila nitong Agosto 20 sa Camp Bagong Diwa, Bicutan sa Taguig City mula sa Philippine General Hospital (PGH) sa Maynila. Si Oliveros ay kabilang sa tinaguriang "Morong 43," mga manggagawang pangkalusugang iligal na inaresto sa Morong, Rizal noong Pebrero habang nagsasagawa ng pagsasanay-medikal.

Sa utos ng Morong Regional Trial Court, inilabas sa ospital si Oliveros na nagsilang sa pamamagitan ng *caesarian section*. Naka-

wheelchair siya at nakaposas ang mga kamay. Taliwas ang utos ng RTC sa naunang utos ni Justice Sec. Leila de Lima sa mga piskal ng gub-

verno na huwag tutulan ang pananatili ng mag-ina sa PGH.

Samantala, nagpadala ng sulat kay Aquino si Murray Horton, kalihim ng Philippine Solidarity Network of Aotearea (PSNA), na humiling na pairalin ang diwa ng katarungan at palayain na ang mag-inang Oliveros, ang iba pang kabilang sa "Morong 43" at lahat ng mga detenidong pulitikal sa bansa. Aniya, hindi tamang lugar ang bilangguan para sa mga walang salang manggagawang pangkalusugan at lahat ng biktima ng di makatarungang pagkakakulong ng rehimeng Arroyo, ani Horton. **AB**

Patakaran ng tortyur sa Pilipinas, muling tumatampok


Ang pagkakalantad ng isang bidyo na nagpapakita ng pagpapahirap ng isang upisyal ng pulis sa isang pinaghihinalaang kriminal ay patunay na ang tortyur ay patakaran ng militar at pulisya sa Pilipinas. Ito ang pahayag ni Melissa Roxas, isang aktibistang Pilipino-Amerikano na dinukot sa Tarlac noong Mayo 2009 sa paratang na siya ay myembro ng Bagong Hukbong Bayan.

Anim na araw na tinortyur ng mga elemento ng 7th IB si Roxas bago siya pinakawalan. Sa isang panayam sa US, sinabi ni Roxas na karaniwan nang bahagi ng interogasyon ng militar at pulisya sa Pilipinas ang pagtortyur. Idinagdag niya na di hamak na mas marami pa ang kaso ng tortyur, yun nga lang ay hindi dokumentado sa pamamagitan ng bidyo.

Sinabi rin ni Renato Reyes, pangkalahatang kalihim ng BAYAN, na mayaman na ang dokumentasyon ng mga kaso ng tortyur, pero ngayon lamang ito nabibigyan ng malaking pansin ng gubyrerno. Bukod sa kaso ni Melissa Roxas, tinukoy din ng BAYAN ang mga kaso ng "Morong 43," ng magkapatid na Raymond at Reynaldo Manalo at ng mga estudyanteng sina Karen Em-

peño at Sherlyn Cadapan na pangawang mga biktima ng pagdukot at pagtortyur. Iginiit ng BAYAN sa rehimeng Aquino na imbitahan ang UN Special Rapporteur on Torture na si Manfred Nowak para imbestigahan ang seryosong mga kaso ng tortyur sa ilalim ng kasalukuyan at dating mga administrasyon. Ani Reyes, kahit paulit-ulit na sabihin ni Pres. Benigno Aquino III na hindi patakaran ng kanyang gubyrerno ang tortyur, patuloy na maglalakas-loob ang mga nagtotortyur hangga't walang aktwal na kinakasuhan at hinahatulan.

Ang bidyong muling nagpatingkad sa usapin ng tortyur ay nagpapakita ng isang lalaking hubo't hubad na iniinterogeyt habang nakahiga sa sahig ng isang upisina. Pinapalo siya sa mukha ng isang



upisyal ng pulis gamit ang kahoy at hinahatak ang lubid na nakatali sa ari ng biktima tuwing hindi ito makasagot sa tanong. Kitang-kita sa bidyo na namimilipit sa sakit ang biktima dahil sa pagpapahirap sa kanya.

Nakilala ang upisyal na si Sr. Insp. Joselito Binayug, hepe ng Asuncion Police Community Precinct sa Tondo, Maynila at natukoy na ang lugar na ipinakita sa bidyo ay upisina mismo ng kanyang presinto. Sampu niyang tauhan ang tinukoy ding sangkot sa naturang krimen.

Ayon sa mga impormante, ang biktima ay sinalbeyds na ng mga tauhan ni Binayug. Dalawang pamilya na ang nagsasabing kaanak nila ang biktima. **AB**

Panukalang dagdag na 2 taon sa batayang edukasyon, tinututulan

Mariin at malawak ang inaning mga batikos ng panukalang dagdag na dalawang taon sa batayang edukasyon.

Isiniwalat ng Alliance of Concerned Teachers (ACT) na ang nasa likod nito ay ang malalaking imperyalista at kumprador na korporasyon, bangko at sugo nilang mga pampinasyang teknokrat na siyang nagtulak na ipasok ang panukalang ito sa programang pang-edukasyon ng bagong rehimen.

Sa likod nito ang interes na pangunahing maituon ang paghuhulma ng mga estudyante para mas maaga at mas madaling mapakinabangan sa mga simpleng praktikal at teknikal na kaalaman na kailangan ng mga multinasyunal at kumprador na kumpanya.

Bukod sa isinasakripisyo nito ang paghuhubog ng mga estudyante sa mas makabuluhan, mas malawak at mas malalim na kaalaman, walang konsiderasyon ang panukala sa mas malalimang problema ng bulok na sistemang malakolonyal at malapyudal sa bansa at ibinubunsod nitong pagkaatrasado ng ekonomya dahil sa kawalan ng tunay na industriya at repormang agraryo na nagreresulta sa malawakang disempleyo, kahirapan, kabulukan ng mga serbisyong sosyal, at iba pang kaakibat na mga problema.

Nagbubulag-bulagan pa ang panukala sa kabulukan at korapsyon sa buong imprastruktura at serbisyong pang-edukasyon ng gubyrerno at ang lubhang kahirapan ng mga pamilya na mapag-aral ang mga anak nila.

Ayon kay ACT Teachers Party Rep. Antonio Tinio, ang dagdag na dalawang taon ay magpapalaki sa bilang ng mga kabataang hindi na makapag-aral. Sinabi pa ni Tinio na

habang tumataas ang halaga ng batayang edukasyon na dapat sana ay libre, makakapagparami pa ito sa mga estudyanteng di makakatapos ng pag-aaral.

Sinabi naman ni Terry Ridon, tagapangulo ng League of Filipino Students (LFS), na hindi solusyon ang nasabing panukala upang mapaganda ang kalidad ng edukasyon.


Dagdag na gastos lamang ang dagdag na dalawang taon. Sa bansang kalakhan ng mga pamilya ay walang sapat na kinikita, pabigat ang dagdag na dalawang taong gastos sa pag-aaral. Pangalawa, hindi naman ito paglalaanan ng pondo ng bangkaroteng gubyrerno. Isa ang Pilipinas sa may pinakamababang inilalaan sa edukasyon, kumpara sa iba pang aytem sa

pambansang badyet. Pangatlo, hindi nito lutasin ang problema sa kawalan ng trabaho. Ipinangangalandakan ng mga nagpapanukala nito na kung masusunod ang 12-taong batayan at sekundaryong edukasyon, hindi na mangangailangan ng diploma sa isang kolehiyo ang mga estudyante para makapagtrabaho. Pero ngayon pa lamang, kahit ang mga nakatapos sa kolehiyo ay hindi makakuha ng trabaho. Noong nakaraang taon, mayroong 300,000 ang nagtapos sa kolehiyo. Mayorya sa kanila ay napapabilang ngayon sa mga walang trabaho. Mas malala pa,

ang panukalang ito ay nakatuon sa pagpapalitaw ng mga manggagawa para sa mga industriya sa labas ng bansa o mga dayuhang kumpanya sa loob ng bansa.

Ayon pa sa LFS, kailangan mu nang ayusin ang problema sa sistema ng edukasyon kagaya ng kakulangan sa mga klasrum, libro at guro. Dapat dagdagan ang badyet sa edukasyon dahil bagsak na ang kalidad ng edukasyon kung ikukumpara sa ibang bansa, giit pa ni Ridon. Maglulunsad ang LFS ng mga kilos-protesta at *signature campaign* upang tutulan ang nasabing plano.

Plano ni DepEd Sec. Bro. Armin Luistro na gawing pitong taon ang elementarya at limang taon naman ang hayskul. Pabor naman ang mga pribadong paaralan na tiyak na magkakamal ng malaking kita dahil sa dagdag na mga taon. AB



Sentimyento ng ilang upisyal ng AFP, inilabas

LALONG tumitingkad ang hidwaan sa loob ng Armed Forces of the Philippines (AFP) matapos kumalat ang isang manipesto na bumabatikos sa paboritismo sa institusyon.

Nilalaman ng isang tatlong-pahinang manipesto na inilabas ng mga “nagmamalasakit na upisyal” ng AFP ang pagbatikos sa sistema ng promosyon. Ayon sa manipesto, nawawalan ng saysay ang AFP Board of Generals na siyang may kapangyarihang magtalaga ng mga upisyal. Ito ay dahil daw sa pakikialam ni Defense Secretary Voltaire Gazmin sa promosyon. Wala na raw

ginagawa ang kalipunan kundi mga mag-apruba na lamang ng mga desisyon ni Gazmin.

Kinwestyon nila ang pag-una umano ni Gazmin sa kapakanan ng mga dati niyang kaklase sa Philippine Military Academy (PMA) at mga dating tauhan. Halimbawa nito ang paghirang kay AFP Chief of Staff Ricardo David na dati niyang tauhan sa Presidential Security Group (PSG) noong panahon ng rehimen ni Corazon Aquino. Ang iba pang upisyal na naitalaga sa mga pusisyon nila dahil sa pagiging malapit nila kay Gazmin ay sina Maj.

Gen. Gaudencio Pangilinan, bagong hepe ng Northern Luzon Command; Brig. Gen. Romulo Bambao, bagong hepe ng Intelligence Service of the AFP; at Maj. Gen. Arturo Ortiz, bagong hepe ng Philippine Army.

Samantala, si Adm. Feliciano Angue, dating hepe ng AFP National Capital Regional Command ay sinibak, inilagay sa *floating status* at ipinailalim sa imbestigasyon matapos niyang ibunyag na may ilang matataas na upisyal ng AFP na sangkot sa pandaraya sa nakaraang eleksyon at ngayon ay ginagantimpalaan ni Aquino.

Masisibang upisyal ng mga GOCC

NAGLALAKIHAN ang tinatanggap na sweldo at benepisyo ng mga upisyal ng Government Owned and Controlled Corporations (GOCC) habang napapako naman sa mababang antas ang sahod ng mga empleyado nito. Nabunyag ang mga detalye nito sa isinagawang pagdinig sa Senado noong Agosto 17.

Kumikita ng P26.865 milyon bawat taon si Armand Arreza, administrador ng Subic Bay Metropolitan Authority (SBMA). Inamin din ni Arreza na nakatanggap siya ng *intelligence fund* na umaabot sa P5 milyon. Tumatanggap naman ng P14.506 milyon kada taon si Benigno Ricafort, direktor ng Clark Develop-

ment Corporations (CDC). Ang Deputy Chief Executive Officer ng Development Bank of the Philippines na si Edgardo Garcia ay kumikita ng P12.718 milyon, samantalang P10.772 milyon naman ang kinikita ni Armando Tetangco, Governor ng Bangko Sentral.

Ayon kay Sen. Franklin Drilon, umaabot sa P47 milyon ang nadadagdag sa depisit ng bansa dahil sa naglalakihang mga sweldong ito. Hinamon naman ni Bayan Muna Rep. Neri Colmenares ang Malacañang na tanggalin ang *intelligence fund* ng SBMA at CDC. Hindi rin dapat itakda ng mga direktor ng GOCC ang kaniilang sariling sweldo, dagdag pa ni Colmenares.

Di makatarungang pagsibak sa direktor ng PAGASA

UMANI ng pagbatikos si Pres. Benigno Aquino III at mga upisyal niyang nasa likod ng kara-karang pagsibak kay Dr. Prisco Nilo, direktor ng PAGASA (Philippine Atmospheric, Geophysical and Astronomical Service Administration).

Biglang sinibak ni Aquino si Nilo noong Agosto 6 dahil umano sa kabiguan ng PAGASA na malaman ang magiging takbo ng bagyong Basyang na humagupit sa bansa noong kalagitnaan ng Hulyo. Ipinaliwanag ni Nilo na may mga pagkakataong nagkakamali sa prediksyon sa takbo ng bagyo bunga ng

lubhang kalumaan at kakulangan ng PAGASA sa kagamitan at tauhan. Dahil dito, kadalasa'y de-mano ang paraan ng mga kalkulasyon nila at inaabot nang magdamag sa pagtatrabaho. Sa kabila ng paliwanag, kinuha lamang at lubos na kinatigan ni Aquino ang panig ng kanyang bagong kalihim ng Department of Science and Technology (DOST) na si Mario Montejo, na banyaw ng kanyang Executive Secretary na si Paquito Ochoa. Matagal nang may panukala ang PAGASA na bumili ng mga bagong kagamitan at kumuha ng karagdagang tauhan,

pero hindi ito tinutugunan.

Ayon sa Advocates of Science and Technology for the People (Agham), ang pagsibak kay Nilo ay masamang senyales para sa mga manggagawang syentista na nagtitiis na magtrabaho sa gubyerno sa kabila ng mababang sahod at bulok na pasilidad. Ang mga patriyotikong syentista, na nagpapasyang manatili sa bansa sa kabila ng mababang sweldo, kakulangan sa pondo at mga lokal na oportunidad ay maitataboy lamang sa halip na mapag-ambag sa pambansang pag-unlad, anang Agham.

Umento sa singil sa mga *tollway*, ipinagpaliban

NAGLABAS ng dalawang Temporary Restraining Order (TRO) ang Korte Suprema noong Agosto 13 upang pansamantalang itigil ang umento sa singil sa South Luzon Expressway (SLEX) at ipagpaliban ang pagpapataw ng Expanded Value Added Tax (EVAT) sa mga *expressway* sa buong Luzon.

Binigyan ng Korte Suprema ng sampung araw ang Bureau of Internal Revenue (BIR) at Dept. of Finance upang magbigay ng reaksiyon sa petisyon laban sa dagdag buwis sa *toll*. Sinabi rin ng Korte na nasa proseso pa ng deliberasyon ang petisyon sa umento sa singil sa SLEX kaya dapat lamang na maglabas muna ng TRO.

Sinabi naman ng Pinagkaisang Samahan ng mga Tsuper at Operators Nationwide (PISTON) na malaking sampal sa rehimeng Aquino ang inilabas na TRO. Ayon sa PISTON, naging manhid si Aquino sa karaingan ng mga tsuper at mamamayan dahil kaya sana niyang

ipahinto ang dagdag na singil sa pamamagitan ng Executive Order. Nakahanda rin ang PISTON na maglunsad ng kilos-protesta kung sakaling matapos na ang TRO at ituloy ang umento sa singil.

Nanawagan naman ang Bayan Muna na imbestigahan ang iligal na pagtaas ng singil sa SLEX. Sinabi ni Bayan Muna Rep. Teddy Casiño na inabuso ng Toll Regulatory Board (TRB) ang kapangyarihan nito dahil pinayagan nito ang Southern Luzon Tollway Corp. (SLTC) na magtaas ng singil nang walang abiso at pampublikong pagdinig.

Plano sana ng TRB na magpataw ng 250% pagtaas sa singil sa SLEX, labas pa sa 12% na buwis na ipapataw din sa North Luzon Expressway (NLEX), Star Tollway (Sto. Tomas to Lipa, Batangas), Subic-Clark Tarlac Expressway (SCTEX), Skyway at Coastal Tollway. Iginigiit ng Malacañang na dapat magpataw pa rin ng EVAT sa mga *expressway*.

Mga kilos-protesta laban sa Operation Green Hunt

NAGLUNSDAD ng mga kilos-protesta sa tapat ng mga konsulada ng India sa New York at San Francisco sa US at sa London sa United Kingdom ang Sanhati, isang grupong nakikiisa sa mga pakikibaka ng mamamayan sa India. Ang mga pagkilos sa US ay itinaon noong Agosto 13. Sa London, inilunsad ang protesta noong Agosto 15, araw ng kalayaan ng India.

Matapos ang tatlong-oras na protestang kinatampukan ng pagsisigaw ng mga islogan, pamamahagi ng mga polyeto sa publiko, pagpapahayag ng suporta para sa pakikibaka ng mamamayan sa India at pagkanta ng mga rebolusyonaryong awit, isinumite ng mga raliyista sa konsulada ang isang petisyon laban sa paglulunsad ng Operation Green Hunt, ang malawakang opensibang militar ng may 200,000 sundalong Indian sa mga erya ng mga pambansang minoritya sa silangan at sentral na bahagi ng India.

Gera sa Afghanistan, mas magastos na kaysa sa Iraq

UMAABOT na sa \$6.7 bilyon bawat buwan ang nagagastos ng US sa gera nito sa Afghanistan. Di hamak na mas mataas na ito kaysa gastos sa gera sa Iraq na umaabot sa \$5.5 bilyon bawat buwan.

Ayon sa Pentagon, ang dahilan ng paglobo ng gastos sa gera ay ang laki ng ipinadadalang tropa at lohistika sa nasabing bansa. Umabot sa 102,000 tropa ang ipinadala sa Afghanistan kumpara sa 43,000 tropa sa Iraq. Tinatayang nasa \$105 bilyon ngayong taon ang nagastos na sa gera ng rehimeng Obama at papalo ito sa \$117 bilyon pagsapit ng 2011.

Umabot na sa \$1 trilyon ang kabuuan nang nagastos ng US mula nang magsimula ang gera sa dalawang bansa.

Ngayong taon, humingi ng \$549 bilyon ang Department of Defense ng US para batayang gastusing militar. Hindi pa kasama rito ang \$159 bilyon na hiningi nito para sa mga gera nito sa Iraq at Afghanistan. Bahagi ng pondong ito ay napupunta sa ilampung libong pribadong kontratista na sangkot sa mga gerang agresyon nito. Umaabot sa 1.2 milyong kontraktor ang iniempleyo ng US. Malaking bahagi rin ng pondo ang napupunta sa mga kumpanyang gumagawa ng mamahaling mga armas, katulad ng mga *drone* na ginagamit ngayon ng US sa halos lahat ng mga operasyon nito.

Ayon naman sa United Nations (UN), mula Enero hanggang Hunyo ngayong taon ay umabot sa 1,271 ang napatay at 1,997 ang nasugatang sibilyan sa Afghanistan (anim ang namamatay at walo ang nasusugatan bawat araw). Tumaas ito nang 31% kumpara sa mga kaswalti noong 2009. Samantala, 55% naman ang itinaas ng kaswalti ng mga bata kumpara noong nakaraang taon.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 16
Agosto 21, 2010
www.philippinerevolution.net

Editorial

Pakikibaka sa Hacienda Luisita, laban ng masang magsasaka sa buong bansa

Ang Hacienda Luisita ay sumisimbolo sa malakolonyal at malapyudal na sistemang gumagapos sa bansa sa pagkaatrasado at walang katapusang krisis. Ang mahaba at nagpapatuloy na kasaysayan ng asyenda ay salaysay ng masidhing pagsasamantala at pang-aapi, maigting na makauring tunggalian at pakikibaka para sa matagal nang minimithing katarungang panlipunan.

Walang lubay ang maniobra at pakana ng angkang Cojuangco upang mapanatili ang kanilang monopolyo sa asyenda at hadlangan ang pamamahagi nito sa mga magsasaka at manggagawang bukid. Lalo't hawak uli ng angkan ang Malacañang, malakas ang kanilang loob na gumawa ng gayong mga maniobra.

Nito lamang nagdaang linggo, nagpakana ang mga Cojuangco ng huwad na "compromise agreement" na isinalaksak sa lalimuman ng mga magsasaka at manggagawang bukid gamit ang pwersa, panlilinlang, panunhol at panghahati. Pinalalabas sa huwad na kasunduan na sumasang-ayon ang

mga magsasaka at manggagawang bukid sa pagpapatuloy ng Stock Distribution Option (SDO) sa halip na pamamahagi ng lupa. Malinaw na ang layunin nito ay pangunahan ang pagdinig ng Korte Suprema sa petisyon para pawalambisa ang *temporary restraining order* sa utos ng Presidential Agrarian Reform Council (PARC) noong 2005 na ipailalim na ang asyenda sa sapolitang pamamahagi.

Agad na pinalakpakan ni Presidente Benigno Cojuangco-Aquino III ang kasunduan bagamat nagmamaang-maangan siya sa kanyang kinalaman doon at sinasabi niyang ang usapin ng HLI ay simpleng panloob lamang na pagtatalo.

Ang panunumbalik ng mga Cojuangco sa poder ay muling nagpapatampok sa pakikibaka para sa tunay na reponorma sa lupa sa asyenda at sa paggamit ng kapangyarihan para supilin ang paglaban ng mga magsasaka at manggagawang bukid.



Mga tampok sa isyung ito...

Hungkag ang kasunduan sa Luisita
PAHINA 3

10 armas, nasamsam ng BHB
PAHINA 7

Panukalang dagdag na 2 taon sa edukasyon
PAHINA 11

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com